

~~DE~~ LIBERTIS
SEPVLCRORVM CVSTODIBVS

AD LEGEM II. DIG. DE IN IVS VOCANDO
EXERCITATIO

ILLVSTRIS ICTORVM ORDINIS AVCTORITATE
PRAESIDE
AVGVSTO CORNELIO STOCKMANNO

IURISCONSVLTO ET ANTECESSORE

DIE XI. OCTOB. 1811

PUBLICO

AD DISPVTANDVM PROPONIT

GVILIELMVS SIGISMVNDVS TEVCHER

FRIBERGENSIS

IURIS VTRIVSQVE BACCALAVREVS

LIPSIÆ

IMPRESSIT CAROLVS TAVCHNITZ

Manifra

ALL INFORMATION CONTAINED

HEREIN IS UNCLASSIFIED

DATE 11-11-01 BY 1111

1111

1111

1111

1111

1111

1111

1111

1111

1111

AMPLISSIMO

INCLVTAE CIVITATIS FRIBERGENSIS

S E N A T V I

S A C R V M

V I R I
EXCELLENTISSIMI, AMPLISSIMI, IVRIVM
CONSVLTISSIMI, RERVVM METALLICARVM
PERITISSIMI,
PATRONI ET FAVTORES
OMNI, QVA PAR EST, OBSERVANTIA
COLENDI!

Non est profecto, quod magnopere laborem in
conquirendis ac commemorandis causis, quibus im-
pulsus huic libello Vestra splendidissima nomina
inscripserim. Vos enim, Patroni Optimi,
non solum a teneris, ut Graeci aiunt, unguiculis
ad hunc usque diem optime mihi prospexistis,

meque beneuolentiam Vestram ambientem tanta
semper comitate atque humanitate excepistis, ut
amicus magis, quam cliens videri possem; verum
etiam, his nondum contenti, largissimorum stipen-
diorum in me collatione faciliores ac suauiores
reddidistis studiorum meorum annos. Cum igitur
in eo sim, ut edatur iam ac publice defendatur a me
dissertatio quaedam iuridica, lubentissime arripio
hanc opportunitatem, qua acceptior nulla mihi potest
contingere, offerendi Vobis, Viri Consultis-
simi, hocce quaecunque opusculum, tamquam ve-
rissimam grati animi et mirifici cuiusdam amoris
erga Vos mei tesseram. Haud ignoro quidem, per-
multa extare documenta, quae de egregio Vestro
bene merendi studio luculentissime loquantur, ne-
que exiguum esse numerum eorum, qui propen-
sam Vestram atque conspicuam in litterarum cul-
toribus voluntatem palam profiteantur ac praedicent.
Nihilo secius egomet ipse rapiendam de die esse
occasionem arbitratus sum, qua iustissimis Vestris

laudibus sermone meo non tam aliquid addere, quam potius efficere possem, ut tum insignis ista, qua me exornastis, beneuolentia, tum spectatissima, qua urbi patriae prouidetis, sapientia, et in uniuersum eximiae aliae Vestrae virtutes, in illustri quippe atque excelso aliquo loco positae, in omnium ciuium animos atque oculos incurrant.

Accipiatis igitur, Fautores summopere Deuenerandi, pietatis hoc meae monumentum, si ex pretio spectetis, exiguum, sin ex animo, aere perennius, ea, qua semper me condecorastis, benignitate. Intelligatis inde, quanta cum religione propensam Vestram in me voluntatem mihi censeruandam, et, si fieri possit, augendam existimem. Persuadeatis Vobis, omni me animi contentione in eo elaboraturum esse, ut innumeris Vestris beneficiis haud prorsus indignus imos pectoris gratissimi sensus Vobis declarem. Caeterum cum hominum natura ita sit comparata, ut,

quos colunt atque amant, ab iis vicissim amari cupiant, Vos iam, ut Vestram mihi beneuolentiam in posterum quoque sartam tectam praestetis, oro rogoque. Quibus quidem precibus meis humanissimis annuere ut ne dedignemini; pro singulari Vestro fauore, quo per omnem meam vitam frui licuit, non tam spero, quam potius confido

NOMINVM VESTRORVM SPLENDIDISSIMORVM

LIPSIAE

CAL. OCTOBR. clbcccciii.

cultor perpetuus

**GVILIELMVS SIGISMVNDVS
TEVCHER.**

Qui ad uniuersas legis secundae Digestorum de in ius vocando partes singularem, eamque magno doctrinae apparatu commendabilem ac *Miscellaneorum Libro Traj. ad Rheñ. 1765. 8. p. 249 seq.* adiectam Dissertationem exhibuit HENR. IOAN. ARNTZENIVS: is quidem, dum de omnibus omnino, quas, auctore Ulpiano, non licet in ius vocare, personis exponere apud animum constituerat, quaestionem simul mouit de iis, qui propter loci religionem inde se mouere non possunt, nactus inde opportunitatem insurgendi aduersus *Ios. NERIVM Analect. Lib. II. cap. 4. in EV. OTTONIS Thes. Iur. Rom. Tom. II. p. 393. seq.* Solent plerumque in hac, quo viuimus, saeculi mollitie, varietate rerum adeo percelli hominum, ut sunt, animi, ut, populari trutina cuncta ponderantes, non nisi noua et quasi de musto ac lacu feruida probent, antiqua fastidiant. Ego vero, quemadmodum sine reprehensionis nota haud dimittendi, qui iurant in verba magistrorum, ita nullo modo laudandos existimo eos, qui, dum fugiunt vitia, in contraria cur-

runt. Placet igitur, cum antiquior illa Ios. NERII de iis, qui ob loci religionem in ius vocari non possunt, opinio, plausu excepta ab interpretibus iuris ciuilibus, paucis illis quidem, cultissimis tamen, *CHRIST. HENR. TROTZIO Tract. iur. de memoria propagata, Traj. ad Rhen. 1734. 8. Lib. I. cap. VI. §. 5. pag. 380--398.* et inter nostrates a *Jos. LVD. ERN. PVITTMANNO Interpret. iur. ciu. Lips. 1763. 8. cap. XIII. p. 60. seq.* semper mihi visa sit omnium pulcherrima, placet, inquam, μέσσην ὁδὸν τέμνειν, et Nerianam illam sententiam, hac scribendi necessitate imposita, sub examen vocare, eamque aduersus ARNTZENIVM nouis, si fieri possit, argumentis confirmare. In qua quidem defensione suscipienda, ne vaga erret oratio, ita sumus versaturi, ut, collectis, quotquot super his Digestorum verbis exstant, variis ICTORUM sententiis, ex rerum natura atque indole, quale cui-libet pretium statuendum veniat, demonstremus, ipsumque fragmenti, quo de sermo instituitur, sensum, ingeniose satis a Ios. NERIO erutum, paullo curatius exponamus.

C A P V T I.

Examinantur variae doctorum virorum sententiae de loci religione.

Ac primum quidem in commemorandis ac refutandis ICtorum sententiis non sumus nescii otium nobis aliquod iam fecisse *ANT. HENR. VAN HEES Diss. inaug. de iis, quae antiquitus apud Romanos inter litigatores ante litem contestatam fiebant, Lugd. Bat. 1747. 4. typis exscripta, et DAN. FELLENERGII Iurisprud. ant. Bernae 1760. 4. Tom. I. p. 491. seq. inserta, cap. 1. §. 19.* quam miror ad manus non fuisse ARNTZENIO ipsos inter Batauos commoranti. Spicilegium tamen ille reliquit. Etenim, cum diuersae ICtorum sententiae commode possint reduci ad duo genera, quatenus istam loci religionem vel de romana superstitione, vel de re christiana intelligi voluerint: de utroque ita nobis erit agendum, ut singulas opiniones, prout earum auctores ordine sese excipiunt, diligenter examinemus, et, quibus potissimum argumentis quaelibet possit infringi, aut minui, paucis

exponamus. Verba ipsa legis secundae Digestorum *de in ius vocando* Florentiae ita leguntur :

*ULPIANVS Libro quinto ad Edictum. IN IUS vocari non oportet neque consulem, neque praefectum, neque praetorem, neque proconsulem, neque ceteros magistratus, qui imperium habent, qui et coërcere aliquem possunt, et iubere in carcerem duci: neque pontificem dum sacra facit, nec eos qui propter loci religionem inde se mouere non possunt: sed nec eum qui equo publico in causa publica transuehatur, praeterea in ius vocari non debet qui uxorem ducat. * Aut eam quae nubat: nec iudicem dum de re cognoscat: nec eum dum quis apud praetorem causam agit: neque funus ducentem familiare, iustae mortuo facientem.*

Quod paganam primum superstitionem attinet, IAC. RAEVARDVS quidem *Varior. Lib. I. cap. 6.* hoc Ulpiani fragmentum, quod corruptum esse existimauit, ita restituit, ut, duobus vocabulis in unum contractis, pro *se mouere* legat *semoueri*, leuissima sane emendatione, quam CHR. HENR. TROTZIVS de memor. prop. p. 390. medicinam violentam nominauit. Secuti tamen sunt deinceps lectionem istam JAC. GUTHERIVS de iure manum, Paris. 1615. 4. Lib. III. cap. 24. pag. 500. et ANT.

HENR. VAN HEES in *Diss. de iis, quae antiquitus apud Romanos inter litigantes ante litem contestatam fiebant*, cap. I. §. 19. licet in explicanda lege ipsa uterque a *RAEVARDI* sententia recesserit. Contendit hic nimirum, eos, qui ad templorum asyla, aut alia loca religiosa confugerint, non in ius vocari, non trahi aut rapi inde potuisse, idque variis ex locis Plautinis, qui tamen nihil ad vocationem in ius faciunt, voluit demonstrare. Sed templis arisque quamvis penes Romanos aliquando ius asyli competierit, asylis ipsis autem religionem deprehendamus omnino fuisse tributam: a vero tamen haec interpretatio longe aliena videtur, cum constet, *Ulpianum* *ICTum* de securitate et asylo delinquentium in lege laudata plane non disseruisse. Unde merito *RAEVARDVM* reprehendit *JAC. CURIACVS Obseru. Lib. XIII. cap. 29.* quia *Ulpianus* ibi non egit de loco, ex quo vocantur, sed de ipsis hominibus, quibus iuris experiundi causa hoc priuilegium concessum est. Neque indiget ulla emendatione lectio vetus, cum verba *inde se mouere* significant *inde discedere*, quod e *leg. pen. D. de vacat. mun. GERH. NOODT Comm. ad Pand. in Opp. Tom. II. p. 54.* edit. Bat. docuit.

Singularis prorsus est opinio *ULR. HVBERTI Praelect. iur. ciuil. secund. Instit. de poena temere litigantium n. 6.* hoc referentis ad superstitionem veterum, qui variis

ominibus et praesagiis omni die absterrebantur, ne ex aliquo loco discedant: ut, si intrasset in aedes ater alienus canis, si anguis per impluvium deciderat de tegulis, gallina cecinerat, si interdixerat hariolus, si haruspex vetuisset, aut si lacinia consurgenti alicubi obhaesisset. Sed ut mittam, hoc modo in tanta illa Romanorum superstitione vocationem in ius fere semper destitutam fuisse sua vi atque effectum, praesagia ista, fatente ipso Hubero, quolibet die, et tam saepe occurrebant, ut frustranea fuisset privilegii alicuius concessio.

Transeamus ad maiorum gentium Ictos, ANTON. SCHULTINGIUM inprimis *Enarrat. Part. prim. Dig. Lugd. Bat. 1720. 8. pag. 220.* qui cum ELB. LEONINO *Emendat. Lib. I. cap. 20.* et JAC. GOTHOFREDO *ad leg. 8. Cod. Theod. de fide testium et instrumentor. ed. Ritteri Tom. IV. p. 344.* Ulpiani verba intelligit de iis, qui certo aliquo loco ita adstricti sunt, ut discedere inde sine religione non possint, Flamini Diali potissimum ac Vestalibus virginibus. Sed inter omnes constat, omnino et has, et illum, potuisse in iudicium vocari. Diserte TACITVS *Annal. Lib. I. cap. 34. virgines Vestales, ait, in foro et iudicio audiri, quotiens testimonium dicerent, vetus mos fuit.* Idem quoque obtinuit in Flamini Diali. Quamvis enim viri docti prouocent ad auctoritatem TACITI *Annal. Lib. I. cap. 71.* et VALERII

MAXIMI Lib. I. cap. 1. ubi Metellus Pont. Max. Postumium consulem, eundemque Flaminem Martialem, ad bellum gerendum Africam petentem, ne a sacris discederet, mulcta indicta, urbem egredi passus non est; priuilegium tamen hoc est sacerdotii, non loci: excusat ab honoribus et muneribus ciuilibus, non ab in ius vocatione, nisi dum sacris operantur. In ius enim vocari non oportet, ULPIANVS ait leg. 2. D. de in ius voc. nec Pontificem, dum sacra facit, nec eos qui propter loci religionem inde se mouere non possunt. A quibus quidem verbis toto coelo differunt, quae SCHVLTINGIVS una cum sententiae suae patronis ad hunc locum conferre studuit, ab eodem ULPIANO lege 13. pr. D. de vacat. et excusat. mun. scripta, dum ait; praetor eos, quoscunque intelligit operam dare non posse ad iudicandum, pollicetur se excusaturum: forte quod in perpetuum quis operam dare non potest, quod in eam valetudinem incidit, ut certum sit, eum ciuilia officia subire non posse, aut si alio morbo laboret, ut suis rebus superesse non possit, vel si qui sacerdotium nacti sint, ut discedere ab eo sine religione non possint: nam et hi in perpetuum excusantur. Aliud enim est muneri vacare, aliud in ius vocari. Non desunt quidem argumenta, quibus omnia alia demonstrare annisi sunt. Sed cum animaduertam, rejiciendis iis operam suam impendisse ANT. HENR. VAN HEES Diss.

laud. apud *DAN. FELLENERGIUM* Tom. I. p. 512. *seq.* commemorandis iis, ne cramben recoctam apponam, non amplius immorabor.

Alia via incesserunt Pandectarum Interpretes, Io. VOETIVS et HENR. ZASIVS, qui de Aedituo et Pontifice haec verba exponunt. Ille enim n. 3. Ulpiani fragmento eum designatum conjicit, qui sacrorum custodiam sibi habebat demandatam, et in *lege 20. §. 1. D. de ann. leg.* Hierophylacus aut Aedituus appellatur, de quo ex instituto disseruit Io. DE ROEHR *Otio Dauentr. Lib. I. cap. 10.* hic n. 14. in eo ordine, ait, *etiam comprehenduntur, quos iustum tenet impedimentum, quod facit eos honeste comparere non posse, ut Pontifex, dum sacra facit, qui propter religionem loci inde se mouere non potest.* Neutrum. Per se patet, verba Ulpiani generaliter concepta non posse restringi ad solum Aedituum: ZOESII autem sententia statim corrui, si perpendamus, Ulpianum distinguere a Pontifice, cuius iam meminerat, eos, qui propter loci religionem inde se mouere non possunt.

Diuersam ab his, sed elegantem tamen, huius loci sententiam proposuit Io. IAC. WISSENBACHIVS *Exercitt. ad Pand. Disp. VII. Thes. 9. p. 33.* qui de iis, qui sacris intersunt, h. e. de auditoribus, intelligit. *His enim, inquit, fas non est ante decedere, quam omnibus*

sacrificiū caerimoniis peractis, sacerdos succlamet illud sollemne: ILICET; qua voce illos, qui interfuerunt, missos faciebat: ut apud Graecos functus ministerio sacerdos pronunciabat; λαοῖς ἄφεσις. Subscripsit ei MARQV. FREHERVS Parerg. Lib. II. cap. 18. in EV. OTTONIS Thes. Iur. Tom. I. p. 929. ob summam, quae pro religione facit, rationem. At enim vero hoc si admittamus: particula inde non tam ad loci religionem, quam ad sacra erit trahenda. Sed horum, uti dixi, iam antea mentionem fecerat Ulpianus. Deinde res sacra non nisi in loco sacro peragitur, qui non confundendus est cum loco religioso. Est quidem uterque locus diuini iuris: inter utrumque tamen magna differentia. Sacer locus dicatus dicebatur diis superis; religiosus diis manibus, h. e. inferis: illis publice tantum, his priuate. Adeo enim mutabatur ius loci, ut, illato mortuo, statim fieret ex priuato religiosus. Et, ut dicam, quod res est, ne ullo quidem testimonio idoneo comprobauerunt, eos, qui sacris intererant, pronunciata demum formula sollemni: ILICET, discedere potuisse. In iudiciis enim, in exequiis mortuorum, et in reliquis actibus sollemnibus pariter ac in sacris ipsis, ut eorum finis designaretur, teste SERVIO ad Virgil. Aeneid. Lib. II. v. 424. ac TERENCE, fuit adhibita.

Quod cum animaduerneret *ANT. HENR. VAN HEES* l. c. p. 515. putauit is, praesidium aliquod allaturus *WISSEN-
BACHIO*, priuilegii illius rationem, recepta *RAE-
VARDI* emendatione, in cultus diuini exercitio esse po-
nendam, ac verba ipsa explicanda de his, qui sacris qua-
vis de caussa intersint; cui quidem sententiae nouissime
HENR. IO. ARNTZENIVS Diss. laud. accessit. Gene-
ratim enim intelligit Ulpianum de quacunque sacrorum
turbatione, et omnibus omnino, qui sacris quouis ex of-
ficio et ratione adsint. Sed ut mittam, hos non loci
religione, sed ipsis sacris detineri, *religionis* vocabulum,
hac inita ratione, tribuendum foret loco, qui ex Pruden-
tum responsis sacer potius erat, non religiosus. Ipse Imp.
*IUSTINIANVS §. 8. et 9. Inst. de rer. diuis. Sacrae
res sunt*, inquit, *quae rite per Pontificem Deo consecra-
tae sunt: veluti aedes sacrae, et donaria, quae rite ad-
ministerium Dei dedicata sunt: quae etiam per nostram
constitutionem alienari et obligari prohibuimus, excepta
caussa redemptionis captiuorum. Si quis autem auctoritate
sua quasi sacrum sibi constituerit; sacrum non est, sed
profanum. Locus autem, in quo aedes sacrae sunt ae-
dificatae, etiam diruto aedificio, sacer adhuc manet, ut
et Papinianus scripsit. Religiosum locum unusquisque
sua voluntate facit, dum mortuum infert in locum suum.
in communem autem locum purum, inuito socio, inferre*

non licet, in commune vero sepulcrum etiam inuitis caeteris licet inferre. Item si alienus ususfructus est, proprietarium placet, nisi consentiente usufructuario, locum religiosum non facere. In alienum locum, consentiente domino, licet inferre: et licet postea ratum non habuerit, quam illatus est mortuus, tamen locus religiosus fit. Liquet inde, sepulcra, quae ob deorum manium religionem statim a cadaueris illatione in rerum religiosarum numero erant, communem cum his naturam atque indolem habuisse, ita quidem, ut Icti Romani istis vocabulis promiscue et tamquam synonymis sint usi. Prouocat quidem firmandae sententiae caussa ARNTZENIVS ad scriptores antiquos, ipsius inprimis ULPIANI auctoritatem in *leg. 2. §. 19. D. ne quid in loc. publ.* ubi generatim locis sacris religionem tributam esse contendit. Neque ipse tamen potest inficias ire, vocum discrimen non fuisse observatum. Saepissime enim veteres auctores, quas per accuratas definitiones non proponunt, res sacras, sanctas et religiosas confundunt, neque ubiuis eas in eadem adhibent significatione, quod exemplis bene multis demonstrauit ALD. MANVTIVS *Quaesit. per Epist. cap. 10.* in *GRVTERI Lamp. Crit. Tom. IV. pag. 268.* Unde, cum Icti Romani tenacissimi deprehendantur proprietatis verborum, mihi quidem vix videtur haec doctissimorum virorum opinio retinenda.

Superest, ut examinentur adhuc sententiae eorum, qui, quod *ULPIANVS l. 2. D. de in ius voc.* de pagana superstitione memoriae prodidit, id ad *μονασικὴν φιλοσοφίαν* transferre non dubitarunt. Primus itaque in scenam prodeat *FRANC. DVARENVS*, qui in *Comment. ad Tit. D. de in ius voc. cap. 3.* verba Ulpiani opinatur accipienda esse de monachis et monialibus. Belle profecto, ut nihil supra. Cum enim prima monachorum origo, de qua pluribus egerunt *ANT. DADIN. ALTESERRA Libr. Ἀσκητικῶν*, siue *de origine rei monasticae, Paris 1674. 4.* et cum notis *CHR. FRID. GLVICKII, Hal. 1782. 8.* recus. nec non *AVBERTVS MIRAEVS Libr. origin. monastic. Coll. Agripp. 1620. 8.* Ulpiani aetatem nullo modo attingat, sed a Decii demum adversus Christianos instituta persecutione, ubi effugiendorum cruciatuum caussa loca remota et sola sibi quaerebant, sit arcessenda: sane ne per somnium quidem Ulpianus potuit de monachis cogitare. Ut igitur sententiae suae colorem aliquem praetexeret *DVARENVS*, visus est sibi videre eo in loco emblemata Triboniani, sed absque ulla, idonea ratione.

Nec melioris notae est graecorum interpretum ad *leg. 2. D. de in ius voc.* scholion: *ὅποιοι εἰσιν οἱ τόποι, οἷς τίσιν ἑαυτοὺς περικλείουσιν οἱ λεγόμενοι σῆλιται.* Quod ut probent, utuntur *Nov. LXXIX.* auctoritate. Sunt

autem columnarii isti, qui stelas, seu columnas, ascende-
bant, eo consilio, ut seorsim degerent, et Deo viuerent,
tempore Martiani Augusti, uti commemorat *GLYCAS*
Annal. Lib. IV. exorti. Auctorem instituti Simeonem
illum ferunt, quem et *Magnum*, et *Stelitem*, seu *Colu-*
mellam inde appellarunt. Religiosos hos homines ipsos,
GREG. NAZIANZENSIS in poëmate *περὶ ταπεινοφροσύ-*
νης, σωφροσύνης καὶ ἐγκρατείας eum in modum de-
pinxit :

Σάκκω τίς ἄλλος, καὶ σπόδῳ, καὶ δακρύοις
Ἐίλκυσειν οἶκτον, καὶ χαμευνίας πόνω;
Στάσει τε νυκτων ἡμερῶν τε πλειόνων,
Μηνῶν, τὸ τούτου μεῖζον· εἰ δ' εἵποιμ' ἐτῶν,
Ἄπισον οἶμαι· πλὴν ἔμοι πιζὸν λίαν,
Ὅσοι τ' ἐποπταὶ τῶν Φίλων τοῦ θάυματος.
Πίσις γὰρ ἐσῆλωσε καὶ φόβος Θεοῦ.

Sed his priuilegium immunitatis ab in ius vocatione nul-
libi deprehendimus ab imperatoribus gentilibus, conces-
sum. Certum igitur est exploratumque, Ulpianum l. c.
sub loci religione aliud quid intellexisse. Qui cum sub
finem legis laudatae prohibitum scribat in ius vocari non
solum, qui funus ducat, sed et qui iusta mortuo faciat:
quid ni potuerit etiam in verbis antecedentibus relinquere
vestigia paganae superstitionis? Hoc ipsum *IO. LEVN-*

CLAVIUS Notat. Lib. II. in EV. OTTONIS Thes. Iur. Tom. III. pag. 1505. et SACC. HERM. VAN IDSINGA Var. Iur. ciu. Harling. 1738. 8. cap. VII. pag. 52. recte contenderunt.

C A P V T II.

Proponitur Ios. Nerii interpretatio.

Expositis ac reiectis omnium tum veterum, tum recentiorum Ictorum, qui in legem 2. D. de in ius vocando non nihil commentati sunt, sententiis, commemoranda iam venit Ios. Nerii opinio, quae nobis quidem semper arrisit, eaque aduersus HENR. IO. ARNTZENIUM vindicanda. Existimauit autem *NERIUS Analect. Lib. II. c. 4. in EV. OTTONIS Thes. Iur. Tom. II. p. 395.* antiquitus non modo templorum et sacrarum rerum, verum etiam religiosarum et sepulcrorum curam quibusdam fuisse demandatam, qui loco perpetuo addicti inde se mouere non poterant. Recte quidem. Nam diuitum sepulcra suis custodibus curae fuisse, *VET. SCHOL. CRVQ. ad Ho-*

RATII *Epod. XVII. v. 47.* observauit. Occurrunt plurā sepulcralis huius custodiae exempla in auctoribus classicis. Unum excitabo *PETRONIVM Satyr. cap. 71.* ubi Trimalchio testamento catus, ne mortuus iniuriam patiatur: *praeponam*, inquit, *unum ex libertis sepulcro meo, custodiae caussa, ne in monumentum meum populus cacatum eat.* Rursus *EIDEM cap. III.* dicitur matrona Ephesina in conditorium adeo prosecuta esse defunctum virum, positumque in hypogeo, graeco more, corpus custodire. Neque ipsis in Pandectis custodiae huius testimonia desunt. Sic *SCAEVOLA l. 17. D. de aliment. vel. cibar. legat.* ait: *Seruos ad custodiam templi reliquerat, et his ab herede legauerat his verbis: peto, fideique tuae committo, ut des praestes in memoriam meam pedissequis meis, quos ad curam templi reliqui, singulis menstrua cibaria, et annua vestiaria certa.* Quaesitum est, cum templum nondum esset exstructum: ex die mortis, an vero ex eo tempore, quo templum explicitum fuerit, percipere serui debeant legatum? Respondit, officio iudicis heredem compellendum seruis relicta praestare, donec templum extrueretur. Significat nempe templum h. l. monumentum, ut templum C. Marii aliorumque: imo vero ipsa sepulcra nonnunquam vocantur templa. Sic *PAPINIANVS leg. 35. D. de liber. caus.* *Seruos ad templi custodiam, quod aedificari Titia voluit, destinatos, neque*

manumissos, heredis esse respondit. Sic Maevia decedens, teste MODESTINO in l. 44. D. de manumiss. testam. seruis suis sub conditione libertatem reliquerat his verbis: *Saccus, seruus meus, et Eutychia, et Hirene, ancillae meae, omnes sub hac conditione liberi sunt, ut monumento meo alternis mensibus lucernam accendant, et sollemnia mortis peragant.* Ad quaestionem: an seruus et ancillae, cum monumento assiduo non adessent, liberi esse possint, respondit MODESTINVS, *neque contextum verborum, totius scripturae, neque mentem testatricis eam esse, ut libertas sub conditione suspensa sit, cum liberos eos monumento adesse voluit: officio tamen iudicis eos esse compellendos, testatricis iussioni parere.* Sic tandem SCAEVOLA in leg. 18. §. 4. D. de alim. vel. cib. leg. scribit: *cibaria et vestiaria a testatore per fideicommissum data esse, adiectis verbis: quos liberos meos ubi corpus meum positum fuerit, ibi eos morari iubeo, ut per absentium filiarum mearum ad sarcophagum meum memoriam quotannis celebrent.* Mota deinceps quaestione: utrum uni ex libertis, qui a die mortis neque ad heredes accesserit, neque ad sepulcrum morari voluerit, alimenta praestanda sint? respondit ICTUS, *non praestanda.* Quid? quod hanc monumentorum custodiam Romanis usitatum ipsi adeo lapides loquuntur. Apud GVDIVM quidem *Inscript. p. 190.* ut caeteros veterum inscriptionum collectores

missos faciam, haec inter alia leguntur: *libertis libertabus posterisque eorum custodiam monumenti inhabitandi causa fecit.* Tenebantur serui potissimum ac liberti excubias has agere ad dominorum tumulos, ita quidem, ut quas operas in aedibus sacris aedituus in se suscipiebat, eas in sepulcris custos praestaret. De hoc quidem *PROPERTIUS Lib. III. Eleg. 16. v. 24.* cecinit:

Afferet huc unguenta mihi, sertisque sepulcrum

Ornabit custos ad mea busta sedens.

Custodiae huius, quam recte tutelam cinerum *QUINCTILIANUS Inst. Orat. Lib. III. cap. 9.* vocavit, non una fuit ratio, sed plures.

Ac prima statim quaerenda videtur in summa Romanorum, qui quietos cupiebant cineres suos, cura, ut justa et perpetua sedes reliquiis non denegaretur: cuius exemplum commemorat *SCAEVOLA* in *leg. 30. §. 2. D. de adim. legat.* ubi testator codicillos ad heredes suos ita scripserat: *peto a vobis, ut, siue in prouincia, siue in via aliquid mihi humanitus acciderit, corpus meum curetis et in Campaniam, et in monumentum filiorum meorum reportare: ad quam legem videatur IAC. GUTHRIUS de iure man. Lib. III. cap. 23.* Unde *SENECA de breuit. vitae cap. ult.* quidam, ait, disponunt etiam illa, quae ultra vitam sunt, moles magnas sepulcrorum, et operum publicorum dedicationes, et ad rogam munera, et ambitiosas exequias. Quae ut melius procedant, nec detrimenti quid

capiant monumenta ipsa, saepius a defuncto legata deprehendimus relicta libertis aliisque. Hinc PAPINIANVS in leg. 71. §. 2. *D. de condit. et demonstrat.* scribit: *Titio centum relicta sunt ita, ut a monumento meo non recedat, vel uti in illa ciuitate domicilium habeat: potest dici, non esse locum cautioni, per quam ius libertatis infringitur. Sed in defuncti libertis alio iure utimur.* Accedit, quod Romani, religionis tenacissimi, variis legibus prospexerint, ut tum cadauera, aeternae sedi destinata, tum sepulcra ab omni vi et iniuria tuta essent. Ipsius nimis cadaueris violatio fieri poterat expositione, contrectatione, mutilatione, spoliatione, et illegitima translatione; sepulcri autem alienatione, contaminatione per urinam, congerendo terram in sepulcro alieno, stillicidium aut protectum in sepulcrum immittendo, illegitima illatione, inhabitatione dolo malo commissa, et monumenti dimolitione, de quibus omnibus, uti de remediis ad inhibendum crimen concessis, nec non de poenis in violatores constitutis IO. VAN NISPEN *Disp. de sepulcro violato Lugd. Bat. 1723.* in GERH. OELRICHS *Thes. Diss. iurid. select. Vol. II. Tom. III. p. 1. seq.* et ISAACVS VALCKENAE *Diss. inaug. de iure exequiarum Lugd. Bat. 1781. 4. Cap. IV. p. 53. sqq.* copiosius exposuerunt. Unde in lapidibus ac monumentis saepissime inueniuntur inscriptiones, quae violationem nunc deprecationibus, nunc imprecationibus avertant. Neque aliud quid, nisi

sepulcralis custodiae ratio, videtur repetendum e more Romano, quo mortuorum vestimenta, aurum, pecuniam, supellectilem, aliasque res, ut in loco, deorum manium religione munito, melius ac tutius possent asseruari, in sepulcris condebant, ut mittam sacrificia ista annua, in defuncti honorem saepe ex ipsius testamento peragenda, inter quae stato tempore ludos, epulas, aliaque mortis sollemnia instituebant, et de quibus consulendus est *HENR. IO. ARNTZENIVS Spec. Observat. Leouard. 1761. 8. cap. VII. pag. 38. sqq.* Nec silentio tandem praetermittenda est cura odoramentorum, quae statis et sollemnibus diebus sepulcro infundebantur, et lucernarum, quae lychnuchi et bilichnes dicuntur et in omnibus fere monumentis occurrunt. En ardentis lucernae Salerni inuentae inscriptionem !

HAVE. SEPTIMA. SIT. TIBI
TERRA. LEVIS. QVISQ ·
HVIC. TVMVLO. POSVIT
ARDENTEM. LVCERNAM
ILLIVS. CINERES. AVREA
TERRA. TEGAT.

Harum rerum omnium cura, ipsiusque sepulcri custodia, tamquam pietatis erga defunctos imago, iniungebatur libertis, qui, ob summum et inaestimabile libertatis beneficium a patronis acceptum, arctiori vinculo adstricti erant. Hinc Mausolei claves duae penes aliquem libertorum esse

iubentur in lapide apud *GRUTERUM Thes. Inscript. p. 496.* Hinc *APPIANVS de bello civ. Lib. IV. pag. 615.* liberti anonymi meminit, qui, custos sepulcri domini sui, filium herilem proscriptum, in eodem sepulcro, una cum parente, saluum tenuit. Hinc liberti, sepulcris praepositi, exemplo templorum custodum, nacti sunt nomen *aedituorum sepulcri*, quod extat apud *REINSIUM Inscr. class. V. n. 53.*

AEDITVVS. SEPVL. SERG.

FAMILIAE AEDITVAVIT.

ANN. XII.

Hinc lux affunditur Ulpiano de iis, qui propter loci religionem inde se mouere non possunt, in ius non vocandis. Dicitur nempe locus religiosus, in quem mortui hominis integrum corpus, siue caput eius tantum, ossaue, et, ut uno verbo significemus, λείψανα inferuntur, eo consilio, ut ibi perpetuo maneant. Confirmat hoc *FLORENTINVS* in *lege 42. D. de religios. et sumt. funer.* his verbis: *monumentum generaliter res est memoriae causa in posterum prodita: in qua si corpus vel reliquae inferantur, fiet sepulcrum: si vero nihil eorum inferatur, erit monumentum memoriae causa factum, quod Graeci κενotáφιον, id est, inane sepulcrum appellant.* Et *PAVLVS* paullo post in *lege 44. ibid.* ait: *cum in diuersis locis sepultum est, uterque quidem locus religiosus non fit: quia una sepultura plura sepulcra efficere non potest. mihi autem videtur, illum religiosum esse,*

*ubi, quod est principale, conditum est; id est, caput, cuius imago sit, inde cognoscimur. cum autem impetratur, ut reliquae transferantur; desinit locus religiosus esse. Erit igitur sepulcrum, proprio sensu sumtum, ubi religio incipit a glebae iniunctione, licet vocetur etiam *sacrum* ob factam diis manibus consecrationem, et *sanctum* propter sanctionem contra violatores confirmatam et ab iniuriis hominum munitam.*

Neque est, quod, auctore *MARCO LYCLAMA Membran. Lib. VII. Ecl. 22*, reponat *ARNTZENIVS*, laesam esse a libertis, facta in ius vocatione, defunctorum, qui sepulcralem custodiam iusserant, voluntatem. Laesa potius censenda est a constitutis custodibus, ipsa, si inde se mouerant, loci religio, qua sola ii detinebantur. Quod ut existimem, in causa est ipse *ULPIANVS* in *lege 1. D. de mortuo infer.* ubi propositis a praetore verbis edicti: *quo quauē illi mortuum inferre, inuito te, ius est, quo minus illi eo eaue mortuum inferre, et ibi sepelire liceat, vim fieri veto*, adiicit, *qui inferendi mortuum ius habet, non prohibetur inferre: prohiberi autem inferre videtur, siue in locum inferre prohibeatur, siue itinere arceatur.* Quid igitur? Nonne hic sepulcrum dicitur locus? Nonne elocutio Ulpianea: *qui propter loci religionem inde se mouere non possunt*, intellectu faciliior eaque commodior, si de *sepulcri* religione capiatur? Suadet certe tum linguae latinae ratio, tum veterum scriptorum auctoritas. Dicebatur antiquitus sepulcrum etiam *commune sepulcrum*, et *commu-*

nis locus. ARTEMIDORO Lib. I. c. 80. communis ille locus vocatur, qui mortuos accipit: κοινὸς ὁ τόπος οὗτος καλεῖται, ὁ τοὺς νεκροὺς δεχόμενος. Et CICERO Verr. VI. dico nihil istum eiusmodi rerum in prouincia reliquisse, nihil in aedibus cuiusquam, nihil in oppidis, nihil in locis communibus, ne in fanis quidem. Loci communis tandem testimonium adhuc denuncio PLAVTO Prolog. Casinar. v. 19.

Ea tempestate flos poetarum fuit,

Qui nunc abierunt hinc in communem locum.

Ridicule ad haec verba *PAREVS Lexic. Plautin.* adduxit §. 9. *Inst. de rerum diuis.* ubi Imp. IUSTINIANVS ait: *communem autem locum purum inuito socio inferre non licet*, cum apertum sit, *locum communem* ibi opponi ei, qui unius socii est: in PLAVTO autem, qui εὐφημει, commune sepulcrum intelligi, seu, ut cum CATVLLO loquar, locum, unde negant redire quemquam,

Atque ex his quidem omnibus, satis, ut videtur, efficitur, in tantis istis, quibus Lex secunda Digestorum de in ius vocando premitur, difficultatibus, JOS. NERII opinionem, qua ductus in Ulpiano interpretando de libertis, sepulcrorum custodibus, cogitare coepit, quamque aduersus HENR. IO. ARNTZENII vituperia defendendam nobis sumsimus, omnium esse pulcherrimam,

C
PRAENOBILISSIMO DOCTISSIMOQVE
DISPUTATIONIS AVCTORI

S. D. P

P R A E S E S

Quod me potissimum in publice tuenda disputatione Tua Tibi voluisti adesse, Te uche re, Vir Doctissime animoque meo carissime: in eo agnosco amorem Tuum, cognitum quidem et perspectum ab ipso illo temporis puncto, quo primus in mei notitiam venisti, sed nouo documento egregie auctum et confirmatum. Neque mihi iucundius quicquam, aut dulcius contingere poterat colloquii docti Tecum instituendi societate, anno superiori, quo, me teste ac comite, in auditorio publico selecta iuris controuersi capita defendisti, inita, iam vero per nouae eiusdemque sollemnis disputationis oportunitatem renouata, quam nullus dubito maximos voluptatis ac laetitiae fructus Tibi allaturam esse. Cum enim pectoris Tui candorem, ingenii alacritatem, doctrinaeque, quam indefesso studio Tibi

comparasti, elegantiam saepius in scholis meis admiratus: profecto absolutis iam omnibus, quae Iurium Candidatis ex praescriptis legum edenda sunt, tanta cum laude speciminibus, ut summo sis ab Illustri Ordine elogio condecoratus, omnes istae virtutes, quibus ornatum Te conspicio, mihi quidem longe maiores atque splendidiores sunt visae. Ex animi sententia igitur Tibi, Vir Amicissime, hunc facilem studiorum decursum, Consultissimo autem ac Venerabili Parenti Tuo hos dulces curae suae fructus, et, omnibus, quibus necessitudinis vel amicitiae vinculo aliquo iunctus teneris, hos veros gentis suae honores gratulor, et vehementer opto, ut diuina prouidentia Te una cum gente splendidissima per longam annorum seriem praestet incolumem. Caeterum virtutes Tuae, Tua diligentia, Tua modestia, morumque suauitas optima quaeque mihi de Te ominentur, ut adeo persuasus esse possis, Te, si, qua coepisti, via perrexeris in hoc eruditionis et virtutum stadio, uberrima earum praemia aliquando certissime esse capturum. Nulla enim praemia virtutum praemiis sunt certiora. Scr. in Uniuersitate Litterarum Lipsiensi Calendis Octobribus A. O. R. cIdIoCCCCIII.
